



*La Samaritaine ayant trouué Iesus pres du puits de Iacob, fut couuertie par luy, & assuree de la vraye adoration.*

NE femme de la ville de Sichar en Samarie, allant puiser de l'eau au puits de Iacob, trouua Iesus lassé du chemin, assis sur la fontaine, attendant ses Disciples qui estoient allez achepter des viures ; lequel demandant à boire à la Samaritaine, fut repris, & interrogé par elle, qui luy dit, Comment toy qui es Iuif me demandes-tu à boire ; attendu que ie suis Samaritaine, & que les Iuifs n'ont point de communication avec les Samaritains ? Iesus répondant luy dit, Si tu sçauois le don de Dieu, & qui est celuy qui te dit, Donne-moy à boire, tu me demanderois à boire de l'eau viue, car celuy qui en boit n'a iamais soif, & sera fait en luy vne fontaine d'eau rejallissante en la vie eternelle. Seigneur dit-elle. Donnez-moy de cette eau, afin que ie n'aye iamais soif : Iesus luy dit, Appelle ton mary : elle luy répond, Je n'ay point de mary, Tu as bien dit, tu as eu cinq maris, & celuy que tu as n'est point ton mary. Adonc la femme luy dit Seigneur, ie voy que tu es Prophete ; nos Peres ont adoré en cette montagne, & vous dites qu'il faut adorer en Ierusalem, & que là est le lieu où il faut adorer. Enfin Iesus luy dit. Que les vrais adoreurs adoreront le Pere en esprit & verité. Lors cette femme laissant sa cruche courut en la Ville, & dit aux hommes, Venez, voyez vn homme qui m'a dit tout ce que i'ay fait, n'est-il point le Christ ?

*S. Iean Chap. 4.*